



# PERSEVERA

Un página di kurashámentu i guia spiritual pa miembronan di Scouting Antiano



Ougùstùs 2012

Edishon 19 Aña 2

## Konsenshi...

Na edat tempran den nos infansia, nos ta kuminsá realisá kiko ta bon i kiko ta malu. E realisashon ei ta stèm di nos konsenshi. Na prinsipio, esei ta konta solamente den relashon ku nos mayornan i famia mas yega. Segun nos ta bai kresiendo nos konsenshi mester desaroyá pa e sirbi nos di guia den nos trato ku tur, tur hende. Konsenshi ta un heful den nos paden ku ta indiká ki paso òf ki akshon nos mester tuma komo hende honesto, pa nos por respetá nos mes i respetá sintimentu i derecho di nos próhimo. Tin bes un hende por skohe loke e parti negativo di su konsenshi ta indiká, sea pa ganashi, pa rabia, pa vengansa i tin biaha djis pa flohera. Kòrda ku nunca no ta lat pa atmití un eror i korigié di e mihó manera posibel. Lo ta bon pa na final di kada dia, nos repasá nos konsenshi, mira ki bon nos a hasi, pero tambe ken nos lo por a molestiá, ofendé òf perhudiká. Kaba pensa kon nos por drecha loke a bai malu i laga esaki ta nos tarea prinsipal pa ora solo bolbe sali. Pèrkurá pa bo konsenshi no ta un lugá kaminda bèrgwensa ta reina na skondí. Laga bo konsenshi ta un lugá di lus i puresa, ku ta iluminá bo bida, bo kas, bo isla.



*Pablo a wak e miembronan di Konseho Supremo duru den kara i a bisa nan: " Mi rumannan, te dia djawe mi a biba mi bida ku un konsenshi kompletamente limpi den bista di Dios." (Echon 23:1)*

## Tempu...

Tempu! Masha importante pa kada un di nos. P'esei nos ta usa oloshi, kalènder, agènda. Tempu ta bula, nos sa bisa. Promé ku bo sa un siman a pasa kaba. Hesus su dianan tabata hopi okupá. Duna instrukshonnan den snoa i den aire liber. E mester a atendé ku masha hopi hende, pa skucha nan problema i petishonnan, pa duna bon konseho i animashon. Tur ora tabatin un kantidat enorme di hende rònt di djÉ, ku nan súplikanan pa kura nan mes òf un ser kerí.



Tin be apénas E tabata por hala rosea den tantu pushamentu for di tur banda. Semper e tabatin tempu pa su próhimo. Pero tambe e tabata tuma tempu pa Dios.

Vários biaha nos ta lesa den evangelionan ku El a bai un lugá ketu kaminda El a kuminsá resa, buska kontakto ku su Tata. Resa, meditá, reflekshoná ta imperativo pa un bida kristian. No tin nada kontra ku mi ta aktivo, fo'i mainta te anochi, henter dia, ku mi ta partisipá na diferente eventonan, ku deporte, scouting etc ta eksigí hopi ora di mi tempu, ku mi ta gusta wak televishon algun ora pa dia, basta mi tin e habito pa reserva tempu pa Dios. Señor, mi no ke pa mi bida bira superfisial, rutinario, sin contenido. P'esei mi ke buska kontakto ku Bo den orashon i meditashon, por lo ménos algun minüt pa dia.

"Boso mester keda lanta i resa, pa boso no kai den tentashon."  
(Mateo 26:41)



**God fluistert** in onze zielen en spreekt tot onze harten. Soms maken we geen tijd om te luisteren en dan gooit Hij een kei naar ons... De keus om te luisteren of niet... is aan ons...